

## Messatge de La Passem 2018

A la fin d'un concèrt, a l'aute cap de la Hauta Garona, ua equipa que'm vienón trobar pr'amor qu'avèn un saunei. Lo saunei de har córrer la lenga, de'ns har córrer tà la lenga. E jo, córrer que hè bèra pausa que m'a passat ! Mes qu'insistín. Tà realizar aqueth saunei, tà'u rénder possible, que ns'i calèva estar tots : los joens, los menshs joens, los militants, los curiós, los d'ací e los de passatge, los qui an dejà corrut mila camins e los qui vienen de préner l'aviada. Alavetz, amassas, qu'avem saunejat. Saunejat de har córrer la lenga capvath lo Biarn e lo Baish Ador, seguir los gaves, pujar las montanhas, passar los pòrts e tornar baishar los brius. Portar la lenga de dia, de nueit, dab lo sorelh o la ploja, en marchar, en córrer, en chancar, en nadar si cau. Pr'amor la transmission de la nosta lenga, si la volem tà doman, atau que la nse cau pensar, tots amassas, de totas las faïçons possiblas, de tots temps, en nse prémer sus ger tà'ns poder virar de cap a doman, shens jamei ns'estangar.



Uei qu'avèm corrut, cadun, tots amassas : particuliers, grops d'amics, associacions, enterpresas, collectivitats. Aquesta purmèra edicion qu'ei ua beròja escaduda ! Amassas qu'avèm portat la lenga sus 400 quilomètres. Cada sector que s'ei emparat deu projècte tà har viver la lenga e la cultura sus lo son espaci. Corrada, cantèra, repaish, inauguracion de panèus, videòs, bals... e que'n desbrembi segurament ! Las iniciativas que son estadas numerosas, creativas e variadas ! Las causas n'an pas de s'estangar adara. Lo ligam que l'avèm pres en man, ne'u devem pas mei deishar. Qu'a de perseguir lo son camin. Contunhem de ligar las iniciativas, las energias, las personas, los lòcs on har viver la lenga ! Persequim aqueth moment de partatge e d'escambi. Parlem, cantem, escrivem, legem, escotem, dancem, contem la nosta lenga. Qu'avèm las cartas en man, a nosauts de'ns i har.

Siam capborruts.

En dus ans que ns'i tornam ! Aquesta dimenjada cadun qu'a hèit un pas, cadun qu'a dit un mot. Qu'ei açò la corrada :

Un mot tà cada pas, un pas tà cada mot.

Joan de Nadau

